

VRE yog dab tsi?

VRE lub npe yog Vancomycin Resistant Enterococci. VRE yog ib hom kab mob enterococcus uas tawm tsam cov tshuaj tua kab mob xws li penicillin, gentimicin, thiab vancomycin. Cov tshuaj no kheev muab siv los mus kho cov muaj tus mob Enterococci, tab sis tsis ua hauj lwm rau cov mob los ntawm tus kab mob VRE.

Enterococci yog ib co kab mob uas pom nyob rau hauv neeg txoj hnyuv thiab poj niam txoj hnyuv hauv chaw mos. Yuav luag txhua tus neeg muaj cov kab no txij thaum yug los, thiab yuav muaj nrog lawv mus tas lawv lub neej. Nws kuj tsis ua kom muaj mob li cas, tiam sis thaum ib tus neeg lub cev tsis muaj zog tiv thaiv kab mob lawm yuav ua rau nws tau tus mob los yog ua mob rau lwm qhov ntawm lub cev los ntawm qhov mob rau txoj hnyuv.

Yog vim li cas VRE thiaj tseem ceeb?

Qhov zoo ces, tus kab enterococci tsis ua kom mob loj, tshwj xeeb yog cov neeg noj qab nyob zoo. Thaum ho tau mob lawm, kuj yog ib qho me (xws li mob txeeb zig), los yog kuj ua teeb meem loj nrom siav nrag, xws li cov mob endocarditis (mob rau hauv daim pluag thaiv txoj hlab plawv). Cov mob los ntawm VRE kuj kho tsis yooj yim vim tsuas muaj yam puav tshuaj tua kab mob thiaj yuav tua tau cov kab mob no. Tej thaum kuj yog ib qho nyuaj mus nrhiav kom yog cov tshuaj los tua tus kab mob no. Tej thaum kuj nrhiav tsis tau cov tshuaj kom yog los tua tus mob VRE no. Thaum zoo li no, tus mob los ntawm VRE no kuj yuav hnyav thiab ua kom tuag tau.

Yog muaj tus kab mob VRE xwb kuj tsis loj luaj twg. Tib qho teeb meem ces tsuas yog tias tej zaum nws yuav ua mob tau rau yav tom ntej, ces yuav kho tus mob nyuaj no xwb.

Ib tug neeg yuav kis tau tus kab mob VRE li cas?

Nws muaj ob txoj kev uas ib tug neeg twg yuav tau tus kab mob VRE nyob hauv nws. (1) Tej thaum cov neeg muaj mob es noj cov tshuaj tua kab mob kuj yuav tau tus kab VRE no vim hais tias cov tshuaj tua kab mob ua tau rau kom tus kab Enterococci nyob hauv lawv cov hnyuv tawm tsam cov tshuaj, los yog cov tshuaj tua kab mob tua tau cov kab Enterococci lawm es tseg tau cov kab Enterococci tsis zoo (VRE) kom hlaw tuaj. (2) Neeg kuj kis tau tus kab mob VRE los ntawm lwm cov uas muaj tus kab mob VRE nyob hauv lawv cov quav es tsis nquag ntxuav tes kom zoo.

Yog kuv kis tau tus kab VRE lawm, kuv puas yuav muaj nyob nrog kuv mus tas kuv sim neej?

Qhov nov kuj tsis paub tseeb. Ib txhia neeg tsuas muaj cov Enterococci zoo hlaw hauv lawv cov quav thaum coj mus kuaj xwb, tab sis yog siv cov tshuaj tua kab mob, tej zaum tus kab mob VRE kuj rov tshwm dua tau.

Kuv yuav pab nrog tiv thaiv kom tus kab mob VRE txhob kis mus li cas?

Ntxuav tes yog qhov tseem ceeb tshaj plaws. Yuav tsum ntxuav tes txhua zaus tom qab siv tsev dej tas, muab xab npum thiab dej los ntxuav tes kom ntev tsawg kawg li 15 feeb (seconds). Yog koj yeej muaj tus kab mob VRE, tus neeg tu koj yuav tsum looj hnab looj tes thaum nws kov tej kua los ntawm lub cev los xws li zis thiab kua paug los ntawm tej qhov txhab los, thiab ntxuav tes tom qab hle hnab looj tes. Tej chaw uas paug kua faj siv uas yog los ntawm neeg lub cev yuav tsum muab cov tshuaj tua kab mob los ntxuav.